



Kristian Thalal Pawl  
Chanchinbu  
Thla tin chhuak  
~ 1970 ~

# KRISTIAN THALAL



VOLUME XIV NO. 11 | FEBRUARY 2024

## KRISTIANNA LEH KOHRAN

- *Lalrinpuia*



An Chanchin-  
JURGEN NORBERT KLOPP  
- *F. Lallianzuali*

TAIMA RAWH  
- *T. Upa K. Lalnunluanga*

KTP LEH KEI  
- *H. Lalremruata*

## VANGLAINUN - KRISTA TAN

- *Upa G. Ngurhuanluanga*

KAWNG THAR ZAWHIN  
KALPHUNG THAR NEN  
- *Lalhrualtuanga*

Thalaite Suangtuahna  
TAWNGTAINA  
- *R. Vanlalthawhpua*

EDITORIAL - HUKHATUTE GUANGHIN - HIRINGLANG TLANG - KANTU - KEIMANINI



One in Christ 2024 term  
inhlantarna hmanpuia hruaitute chhuahna



Ruihlo do chungchanga Kohhran Thalaj  
nena inkawmhoahna OB te an tci ve



Work Camp - Falkawn Branch



YRC Convention Centre hlimthla

**KRISTIAN THALAI PAWL CHANCHINBU THLA TIN CHHUAK**

Chhuah tan kum : 1970 | Kum 54-na | Kuminah wavi 2-na | Chhuah tawh zat : 543

**Editor** : Malsawmdawngliana**Joint Editors** :

Upa Robert Lalrinawma

Rinsailova Sailo

F. Lalremruata

P.C. Lalthanmawia

C. Lalkhawngaiha

F. Lallianzuali

**Manager** : Agnes Lalrinzuali**A lak man** :

Kum khatah : ₹ 100.00

Copy khat : ₹ 9.00

*Thu chhuah tûr nei chuan Editor, Kristian Thalai, Synod Office-ah thawn tûr a ni a; a la duh chuan KTP Office-ah a man pèk lâwk a ngai.*

**Manager's Mobile** : 8119964685

**E-Mail** : [kristianthalai1970@gmail.com](mailto:kristianthalai1970@gmail.com)  
[centralktp@gmail.com](mailto:centralktp@gmail.com)

**KRISTIAN THALAI PAWL****Thupui**

Rawngbawl tûra chhandam

**Thupui inngahna**

Ephesi 2:10 : Thil tha ti atân Krista Isuaah chuan siama awmin, ama kutchhuak kan ni si a, chu thil tha tih chu kan awmna tûrin Pathianin a buatsaih lâwk a ni.

**Thil tumte**

1. Isua Krista rinna leh amah anna kawnga thalaite hruai.
2. Kohhran kut ke ni tura thalaite buatsaih.
3. Kohhran hnathawh tihpuitlin.
4. Krista Chanchin Tha puan darh.

**A CHHUNGA THU AWMTE**

1. Editorial	2
2. Sermon – Vanglai nun - Krista tan – Upa C. Ngurthantluanga	3
3. Kristianna leh Kohhran – Lalrinpuia	8
4. Thalaite suangtuahna - Tawngtaina – R. Vanlalthawhpua	12
5. An chanchin - Jurgen Norbert Klopp – F. Lallianzuali	14
6. Taima rawh – T. Upa K. Lalhnutluanga	17
7. KTP leh kei – H. Lalremruata	21
8. Kawng thar zawhin kalphung thar nen – Lalhruaitluanga	24
9. Hruaitute chanchin – Tv. Malsawmdawngliana, CKTP Committee Member	28
10. Work Camp Report – Falkawn Branch	29
11. Hringlang Tlâng	30
12. Kantu – Khawzawl Dinthar Branch	31
13. Keimahni	32

**PAWL ROPUI  
KRISTIAN ṬHALAI PAWL**



February thla kan lo chuangkai leh ta. KṬP Day thla a ni a, KṬP Day a lo thlen hian he pawl ropui Kristian Ṭhalai Pawl a lo ding hi a hlutzia te, a ṭhatzia te min hriat chhuah thartir fo ṭhin. He pawl hi awm ta lo sela tuna a chhûnga awm tam takte hi mahni nih tur ang ni phak lo pawh kan tam viau mai awm teh e.

KṬP a lo awm leh chu pawla tel ve theia kan han awm ringawt mai te hi kan vanneihzia hi ngaihtuah nawn fo tham a tling awm e.

Kan ṭhatlai hun hi wawi khat chauh a ni a, a bak beisei leh tur a awm tawh lo. Kum bithliah avangin KṬP aṭang hian nawr chhuahin kan la awm ngei ngei dawn. Ṭhatlai/vanglai hun hman na atan KṬP aia ṭha hi a awm lo tih hi a hre chiangtute vek kan ni ang a, kan tel theih chhung na na na hi chuan âm taka tel ve zel mai hi a fuhin a lo nuam ber mai.

Tleirawl nun aṭangin ṭhalai nun kan han chuangkai a, kan nun speed pawh a sânghin hringnun hi a palin kan pal bawrh bawrh a ni ber mai. KṬP chuan nun kawng min kawhhmuhin min lo kaihruai a, kan tel ve ṭlat chuan kan hriat loh karah nun tak min neihtirin van kawng min lo kawhhmuh ṭhin a ni.

Hei erawh theihngihl lo ila, kan KṬP lutuk na lamah KṬP zûnah hian a uai theih a, a ṭhat lohna lai hmu thiam lek lo khawp hian a lo KṬP theih viau mai. A ṭha lo lai pawm thiam, a ṭha lai seng lût thiam nih a pawimawh. Kohhran notê kan nihna te pawh hi kan theihngihl deuh lek lek ṭhin. KṬP chu Kohhran zai ngai tak zela kal tur kan ni tih hi kan hriat nawn fo a pawimawh. Psychologist-ho chuan mihring nun hi heti hian an sawi a - *a zatve a hlimawm, a zatve erawh a hrehawm* niin an sawi a, a inpawlh chiat a ni ber. Hetiang deuh chiah hian thlarau lam nunah pawh a nuam ringawt kan umna lamah hian kan dai sual lek lek fo ṭhin. KṬP chu a nuam tur a ni a, a nuam hlang erawh a ni kher chuang lo. Kohhranah hian nghet ila, a chhungah hian ei tur chaw tak hi zawng ila eng tik lai pawhin ei tur a awm reng a ni. Programme pawh a hlimawm chang te, a thu tak leh a khal deuh chang awmin a inpawlhsawp a, heng zawng zawng hi kan nun min sawh nghettu atana hmanraw pawimawh tak a lo ni zel a ni. Hawh u, Member-te he pawl ropui tak kan neih avang hian i lawm thar leh teh ang u. Kristian Ṭhalai Pawl vul zel se.

  
(Editor)

# VANGLAI NUN - KRISTA TAN



## Sermon



— Upa C. Ngurthantluanga

*“Aw ka Pathian, ka vanglai niahte hian mi la bo suh ang che,”*  
(Sam 102:24)

Naupangin nulat tlangval hun an nghakhlel a, kum upaten an vanglai hun an ngai vawng vawng thin. Chu chuan vanglai nun hlutzia a tichiang hle awm e. Ni e, vanglai nun hi kan chak vanglai leh kan tha zat lai, mahni tawk theuhvah kan hmel pawh a thatlai a ni a, tangkai taka hman theih a nih laiin chhiatpui der theih a ni bawk. Chuvangin, vanglai hun kan hman dan hian dam chung hun kan hman dan tur a hril thui hle a ni. Chu hun pawimawh tak ‘Vanglai Nun’ chu KTP kum bithliah chhûngah hian a awm avangin vanglai

nun Krista tana hman hi KTP  
dinchhan ber ni pawhin a lang.

### **VAWI KHAT CHAUH**

Hebrai 9:27 (*Tin, mihring tan  
vawi khat thih ruat a ni*)

Mi tin hian he khawvelah hian vawi khat chauh hun kan nei a, kan hun tawn mek te hi kan hmang nawn leh tawh dawn lo. William Shakespeare-a thu khawchang, *“He khawvel hi lemchan tualzawl (stage) ang a ni a. Lem changtute mahni chan hun theuhva an rawn lang thin*

*ang hian, he khawvelah hian mihringte hi kan inlan chhawk a, mahni chan hun kan hman zawh chuan kan lang nawn leh ngai tawh lo”* tih hi a dik hle awm e.

He khawvelah hian vawi khat chauh zel hun kan nei. Pan lai hun vawi khat chauh, nutling patling nih pawh vawi khat, kan dam rei deuh a nih pawhin vawi khat ‘tar’ kan ni ang a, chumi hnuah chuan Bible sawi angin, *‘Mihring tan vawi khat thih ruat’ (Heb 9:27)* chu mathei lovin kan

chungah a lo thleng tawh ang. Chutiang bawkin vawi khat chauh *thalai* kan ni dawn a, vanglai hun hi kan hmang nawn leh dawn tawh lo. Kan vanglai nun hi hmang nawn fo thei dawn ni ila chuan hlim hlawp bawl nan leh khawvel mawina chên zawng te pawhin han hmang lawp lawp ila a lo *tha* lo a nih pawhin a *tha* zawngin kan hmang nawn leh mai tur a ni a. Mahse, vanglai hun vawi khat chauh hman tur kan neih avang hian Krista tana hman loh hi a uiawm lutuk a ni.

Joba'n, "*Ka kir leh tawh lohna tur kawng ka zawh...*" (Joba 16: 22) a tih ang khan kei ngei pawh hian ka kir leh tawh lohna tur kawng chu zawhin ka vanglai hun chu ka lo hmang liam ve ta reng mai! Kha ka vanglai hun kha ngai hle mah ila hman nawn leh tum chhin chi pawh a ni tawh lo. A taka han tawn hian a lo Chiang khawp mai. Vawi khat chauh a lo ni.

## **VANGLAI HUN A REI DAWN LO**

Thuhriltu 11:10 (*In that lai hun a rei dawn lo*)

Pathian thu chuan kan *that lai* hun hi a rei dawn lo tih min

hrilh a. A rei dawn loh avangin min siamtu Pathian hre reng turin thurawn min pe nghal baw. Kum 15 ka nih khan Bial KṚP Conference-ah ka kal ve *tan* a, zaipawl member niin zaipawl intihsiaknaah pawh khan ka tel ve nghe nghe. Tunlai hun *aṅa* teh chuan KṚP-ah khan ka lo tel (active) hma ve phian mai. Pathian leh a kohhran min kaihhraina zarah Branch, Bial leh Central Committee thlengin ka tel ve a ni. Bul kan *tan* hma deuh baw a, kum over thlenga KṚP-a tel ve ta chu tel rei min ti te pawh an awm ta ve ang. Mahse, ka vanglai hun (KṚP member nih chung) ka han thlir let hian a tawin a lo rei lo hle mai a, kum 40 kha ka tling thut ni berin ka inhria! Thlarau nun leh mihring nunphungah pawh KṚP avanga malsawmna leh sawtna ka dawn ropuizia ka ngaihtuahin KṚP a ka tel chung (vanglai nun) kha a rei lovin ka kham lo hle a ni.

Kum 40 ka tlin kum, KṚP ka chhuahsan (over) dawn kum chuan KṚP thlah liam (bye bye) turin General Conference-ah ka kal ve a. *Ṭum* danga conference ka hman nen a inang hauh lo,

ka boruak a danglam tlat. Thalai hla lar tak, ni dangah pawh vawi tam tak ka lo sak chhuah ve fo tawh, KṚP Conference Hlabu-a No 1-na ni ṭhin, 'Kristian ṭhalaite u, lungrual takin' tih hla kan sak apiang khan ka danglam tlat zel! Chang khat leh a thunawnah chuan ka la pangngai deuh a, chang hnihna kan sak thlen aṭangin lunglennain min rawm zēmin hrawk lamah hnawhtu a lo chho va, inrin hmang ka mittui a rawn tla leh ṭhin. A chhan chu eng dang a ni lo, Pathian thu, 'In ṭhat lai hun a rei dawn lo' (Thur 11:10) chuan ka nunah thu a sawi a, a takin ka tawng mek a tin a ni! Ka vanglai hun chu a liam ve ta reng mai, koh kir emaw belh theih emaw pawh fan theih emaw a ni tawh lo va, KṚP member ka ni leh ngai tawh dawn lo. Chu chuan ka rilru a khawih a ni. Tin, a taka tawn chiah khan rin aiin a lo rei lo va, Pathian thu hi a dik, a liam thut mai a ni. Tuna vanglai hun hmang mek, KṚP member la naupang deuhte chuan in la hrethiam chiah lo a nih pawhin ka dem hauh lo che u. Kei ngei pawhin heng hlate hi ka lo sa liam ve mai mai ṭhin kha a nia...

Mahse in hun a lo thlen ve hun chuan vanglai nun rei loh zia hi in la hre ve mawlh ang.

*'Kan vanglai ni te hi a rei lo vang,  
He khawvela kan chām chhûng hian,  
Chuvangin, vanglai hunte hmang ṭhain  
Lalpa tan i thawk zel ang u,'*

## TUN HI HUN LAWMAWM CHU A NI

II Kor 6:2 (*Tun hi hun lawmawm chu a ni*)

Kan Bible-in, "Tun hi hun lawmawm chu a ni a, tun hi chhandamna ni chu a ni" (II Kor 6:2) a tih hi ṭhalaite tan a dik leh zual ngei ang. Vanglai hun hi thil ṭha tih nan hun ṭha ber a ni. Pianthar nan hun ṭha ber a ni a, Pathian rawngbawl nan pawh hun hlu ber a ni bawk. Thuhriltu pakhat chuan, mi 4000 (sangli) vel zette nun zir chianna (survey) a nei a, pianthar chungchanga a thil hmuh chhuah chu hetiang hi a ni:-

Kum 20 tlin hmaa piangthar  
- mi 3200

Kum 20 - 30 inkara piangthar  
- mi 400

Kum 50 - 60 inkara piangthar  
- mi 17

Kum 60 - 70 inkara piangthar  
- mi 1

Kum 20 hmaa piangthar an tam ber a, ‘**nakinah**’ tia khek ho tan pianthar a har tial tial tih a lang reng mai. Krista tan nun hlan tura hun tha lai ber chu vanglai hun hi a ni e. Kum upat lama tih atan khek suh.

Tin, kan vanglai hi Krista tana kan thawh hlawk theih lai ber a ni bawk. Hemi kawngah hian mizo thalaite kan thanharh a hun hlein ka hria. Khawvel thil leh soal lamah kan harh hma (advance) viau lai hian kristian nunah kan puitling har mah mah fo. Inngaihtuah harh a ngai. Thil tha ti tura Krista Isuaah siam kan nih thu hi khek khawtlai lova kan vanglaia tih nghal chi a ni e.

Pathian rawngbawltu ropui leh hlawhtling takte hi an vanglaiin Krista tan an lo che ropui hman viau zel. Tlem a zawng i lo tar lang teh ang.

a) Kum zabi 20 chhunga thuhrlitu lar leh hmingthang Rev. Dr. Billy Graham-a chu kum 1918-ah a piang a, kum 16 a nihin a piangthar a, kum 32 a tlin meuh chuan khawvela

rawngbawltu pawl ropui ber zinga mi BGEA (Billy Graham Evangelistic Association) a din fel der tawh.

b) Mizorama missionary lo kal hmasa Pu Buanga (J H Lorrain) kha Mizoram, lu la hnam tia an hriatte zinga rawngbawl tura a lo kal khan kum 24 mi chauh a la ni.

c) Thuhrlitu ropui leh hmingthang ‘*Thuhrlitu Lalpa*’ tia an koh hial Charles Spurgeon-a chu 1834-ah a piang a, kum 23 a nihin Waterbeach Pastor atan nemnggeh (ordain) a ni der tawh.

d) Kohhran siam that hna thawktu ropui Martin Luther-a chu kum 1483-ah a piang a, kum 24 a nihin rawngbawl tura nemnggeh (ordain) a ni tawh.

e) John Knock-a pawh 1514-ah a piang a, kum 22 a nihin an ordain tawh.

f) India rama missionary ropui tak William Carey chu 1761-ah a piang a, kum 24 a nih chuan hun puma rawngbawl turin a inpe fel der tawh.

g) Harhna hmahruaitu ropui George Whitefield-a chu kum 1714-ah a piang a, kum 22 mi lek a nihin ordain a ni tawh bawk.



Sawi tur dang pawh an la tam ang. Eng pawh ni se, kum 24 hma lama Pastor atana nemngheh ni tur leh Lalpa tan hmun ral̄ti taka rawngbawla chhuak thei tur chuan eng emaw chen lo inbuatsaih a ngai ngei ang a. An tleirawl lai pawhin an lo inbuatsaih nasa hle tawh ang tih a rin theih. Kan hnam hian vanglaia chhawr țangkai hman tur mi inchher chhuah kan mamawh. Chutiang tur chuan naupang lam an inbuatsaih a ngai a, upa lamin kan fuih țan an ngai baw ang. Naupang puitling hma deuh tur kan nuihzat lek lek te hi a pawi thei. Infuiha inchawk tho tawnin vanglai nun Krista tana hman tam thei hnam leh ram ni turin i inbuatsaih ang u. Kan Lal Isua pawh khan kum 33 chhung lekin thil hlu leh ropui a tih tam hman em kha.

Khek hi hlawhchhamna bul a ni a, *'Tun'* hi hun țha ber chu a ni. Kan tih theih a tam emaw a tlem emaw, a langsar emaw a biru emaw a nih pawhin

Krista tan eng emaw chu kan ti thei țheuh mai. Ram thim ram rovah kan kal chhuak thei lo a nih pawhin mahni awmna hmun țheuhvah vanglai hun Lalpa tan i hmang ang u. Thufing pakhat chuan hetiang hian a sawi a *"Thalaite hian min ngaithla theuh dawn ta sela, țawngkam khat lek ka hrilh duh chu 'nangmaha thil awm zawng zawngte kha a țha thei ang berin hmang rawh' tih hi a ni"* He thufing hi zawm a har lo, țhatlai hun hman dan țha ber chu min siamtu Lalpa tana hman hi a ni mai.

Tu tan nge i nun i hman mek? Khawvel thil ral leh mai tur atan nge ? Min chhandamtu Isua Krista tan?

*"Kan vanglai ni hi hlobet par angin,  
A par mawina a la chuai ang,  
Nakinah Lalpa'n min hruai hunah chuan  
A lo la par vul leh ngei ang,"*

tiin, rei lo tea liam leh mai tur i **Vanglai nun hi Krista tana** hman turin pe la, hlim takin Lalpa chu fak mai ta che.

KRISTIAN THALAI

FEBRUARY 2024

*Cover Design :Tv. Lalramthana,  
Bawngkawn Chhim Veng Branch*

## KRISTIANNA LEH KOHHRAN



-- Lalrinpuia,  
Ramthar North Branch

**K**ristianna leh Kohhran hi thil inzawm tlat, lâk hran theih miah loh a ni. A inkungkaih dân pawh hi a thûkin a ril lutuk a, sawi fiah kim harsa tak a ni. Kohhran chu Kristiante mumal taka an insuihkhâwmna, pâwl lian tak ang pawhin a sawi theih awm e. Kristian chu Kohhran-ah a tel ngei ngei tûr a ni tih hi Kristian tam berte ngaih dân pawh a ni ngei ang. Kohhran tih thu mal han lam rik ringawt pawh hian Kristian tih hi sawi hranpâ a ngai chuang lo. Chutiang khawpa thil inkungkaih ril leh thûk chu a ni a, a hrang ve vea sawi fiah hleih theih pawh a ni lo.

Pathianin mihringte hi a huhova khawsâa, nun inpeizâwn tûra a duan kan ni a. Chuvangin, insuihkhâwmna tûr leh a Bible-a Kristiante nun dân tur chanchin ðha puan darhna inzirtîrna kan hmuh rêng rêng hmanraw bul ber a ni. Kohhran hi mahni mihringpuite laka kan hi awm ta lo sê, Kristianna hi a nun dân tûr lam hawi a ni deuh ðhang lian lo vang a, khawvêla zêl a ni. Lal Isua ngeiin, thupêk sakhaw zuitu ngah ber pawh hi ropui ber chu Pathian hi a ni kher lo vang.

zawng zawngin kan hmangaih tûr a ni tih leh, chumi dawttu leh a tlukupui chu mahni mihringpuite kan hmangaih tûr a ni tih thu min hrilh (Matt 22:37-39). Chutiang nun kan zirna hmun leh mi dang hnena hlan chhawn zêlna hmun chu Kohhran a ni a, amah zuitûte

Kristianna hi khawvêla sakhaw hrang hrang zinga pakhat a ni ti ila, kan pawm vek awm e. Amaherawhchu, a duh fir deuh erawh chuan Kristianna hi sakhua (religion) a ni ve lo, RINNA (faith) a ni an ti deuh kher. Kohhran erawh hi chu sâp ðawnga an sawi fiahna pakhatatah

chuan Institution tih a ni. Institution tih awmzia hi J.F. Laldailova dictionary-ah chuan thil dinna, dân zamna, pâwl, dân zirna hmun, rethei châwmna hmun tiin hrilhfiah a ni a, mizo ɽawng thumal pakhat lek hian a sawi fiah zo lo a ni.

Kristianna leh Kohhran hi a history, Kristiante'n Pathian thû an kalpui dân leh an nunphung (culture) a lo zîk chhuahna leh tûn thlenga a rawn pâr chhuah dân hi tawi te tein i han chhui teh ang :

**1. Kohhran hmasa :** Kum zabi pakhatnaah khan kohhran hi a lo piang a, a lo pianna bul ber chu Matthaia 16:18-ah Lal Isuan amah inkâwkin, *“He lungpui chungah hian ka kohhranho ka rem chho vang a...”* a tih kha a ni. A tirah chuan Kristian kha tlêm tê an ni a, tu emaw inah kal khâwmin an inpâwl ho ɽhin. An pung chho ve tial tial a, inkaihhruaina mumal zâwk nei tûrin dân te zamin an inzirtîr zêl a, chanchin ɽha hril dân mumal zawk te duang chhovin, kal chhuak leh a hmun ɽhu tûr pawh fel takin an rel chho ve ɽan a ni.

Hetah hian Isua zirtîrte kha a puipate an ni a, an ɽangkâi hle.

Zirtîr Petera kha a tirah chuan an puipa ber a ni a, Thuthlung tharah pawh kan hmuh, Jerusalem Inkhâwmpui-ah khân Pathian thu hril bakah Kohhran thurin pawh an duang ɽan a; hei hi kum 40 AD vel niin an sawi. He Kohhran hmasa hian Isua Pathianna an zirtîr nasa a, Kohhranin rinna a kalpui dân tûr pawh hetih hun lâi hian an ngaihtuah nasa hle. Chuta ɽang chuan Nicea rinna an tih mai Nicene Creed pawh kha a lo chhuak a ni. Chu chu tûn thlenga Kristiante rinna an ngheh zêlna tûra inzirtîrna pawimawh tak a ni chho ta a ni.

**2. Kohhran mumal zawka din :** Kum zabi 4-na chhovah hian Kristianna hi a ɽhang nasa hle a. Hetih lâi hian Rome lal ramah chuan Kristianna hi khap bur a ni ɽhin. Rome Emperor, Constantine-a rorêlna hnuaiyah kum 313 AD khân Kristianna khap burna chu Edict of Milan tih dân hmangin an hlîp ta a, tu pawh mahni duhthlannain Kristianah a inpe thei ta a, tûn

hmaa a rûka inkhâwm ðhin kha zalên takin an inkhâwm thei ta a ni. Amah pawh Kristianah a inpe bawk. Tichuan, kohhran chu pâwl chak tak a lo ni chho zêl a, ram rorêlna thlengin an huhang pawh a lianin pawimawhna tak an nei chho ta zêl a ni.

Kum 325 AD-a Nicea Inkhâwmpui kha Kristiante rinna kalpui dân tur leh thurin te duan chhuahna bul ber a ni a, Kristiante thurin pawimawh tak zinga mi Pathian pakhata minung pathum (Trinity) kan tih pawh hi an hrilh fiah a, Kohhran hruaitute dinhmun – Bishop leh Puithîam te pawh an mawhphurhna leh an hna bik tûrte fel fâi zâwkin an duang chho zêl a, chu chuan pâwl a tiþhang duangin a ti nghet chho zêl a ni.

**3. Kohhran pâwl hrang hrang :** Hun a lo kal zêl a, Kohhran lo þang lian chho zêl chuan ngaih dân inang lo, Pathian thu rin dân leh pawm dân inang lo a hring chho a, chu chuan inþhen darhna a thlen ta a. Kohhran pâwl –

Denomination hrang hrang kan tih hi a lo pian chhuah phah ta a ni. Kum 1054 AD khân a hmaa Kristian Kohhran pakhat ni mai ðhin kha Roman Catholic Kohhran leh Eastern Orthodox Kohhran tiin hlawm hnihin khawvêl puma Kristiante kha an inþhen ta phuk mai a, ‘Inþhen darh rûnpui’ tiin sawi a ni hial a ni. Chumi hnuah protestant lo chhuak lehin, protestant zîngah pawh Pathian biak dân te, a thu pawm dân leh rin dân inang lo hret hret zêlin Kohhran pâwl hrang hrang a lo piang chho ta zêl a ni. Hetianga kohhran pâwl hrang hrang tam ta lutuk hian kristiante rinna leh nunphung hi hlawm fel taka pakhat anga sawi a ti harsa hle.

**4. Tûnlâi Kohhran :** Tûnlâi khawvêl þang chho zêlah hian Kohhran pawhin kawng hrang hrangin hma a sawn ve zêl a, rawngbâwlna tûr chona thar tam tak a hmachhawn bawk a. Sakhaw zalêlna (secularism) kan tih te vang pawh a ni ang, nunphung chi hrang hrang leh sakhaw nei lêm lo, Pathian awm pawh ring lote thlengin tam tak

an lo chhuak ta a ni. Chutianga ngaih dân leh pawm dân hrang hrang, khawtlang rorêlnaah leh chhungkaw inrelbawlna thlengin kohhran hian rawngbâwlna tûr a ngah ta hle a. Vatican II Council (1962-1965) phei chuan tûnlâi mil zêla Roman Catholic Kohhran chu inhawng zâu zêl tûrin thutlûkna an siam hial a ni.

Tûnlâi technology thang chak tak hmang hian kohhran pawh hian a rawngbâwlna huang a zauh ve zêl a. Hmun hrang hranga kohhran mite inbiak pawh zung zung leh rawngbâwlna pawh a ti awlsam ta em em a, internet leh social media te hi rawngbâwlna tangkâi tak a lo ni chho ta a ni. Inkalpawh kher lo pawhin khawvêl hmun hrang hrang atangin kan inbe pawp thei a, chu chuan kohhran mite zâu leh zûalin a suih khawm kan ti thei baw ang.

### **Tlângkawmna :**

A tir lama kan sawi tak ang khân Kohhran dintu ber chu Isua Krista a ni a, chu Kohhrana tel,

amah ringtute chu Kristian an ti a, heng Kristiante rinna hi a sawi fiah nan Kristianna tih a lo ni ta a ni. Matthâia 16:18,19 kan chhiar chuan, kohhran chu mitthi khaw kulh kawngkhârte chuan an ngam loh tûr thû te, Kohhran chu Vanram chabi pek a nih thû te kan hmu a. Kohhran hi din satliah ni mai lovin khawvêla thuneihaa pek a nih thû kan hmu baw. Chuvangin, kohhran hi pâwl satliah ni lovin, thiltihtheihnaa thûam a ni tih hi kan hriata, kan hlut deuh deuh a pawimawh khawp mai.

Zoram bikah pawh hian Kohhran Pâwl hrang hrang kan tam hle a, kan intai a, kan innêk lek lekin a lang thîn. Kohhran hi vanram châbi kawltu a ni a, pâwl hrang hrangah awm mah ila, intai leh innêk buai lovin kan zui Lal Isua rawng bâwlin Pathian Lal ram din ho tûra inpumkhatin, ke i pên rual zawk tawh ang u.

## ṬAWNGṬAINA



— R. Vanlalthawhpua,  
Piler Branch

**K**a ṭawngṭai dawn kan tih chuan, Pathian kan be dawn tihna a ni a. I lo ṭawngṭai ang u, kan tih pawhin Pathian i be ho ang u kan tihna a ni. Tichuan, ṭawngṭai hi ringtuten Pathian kan biak dan pawimawh tak pakhat a ni.

Eng vangin nge kan ṭawngṭai ang tih hi zawhna pawimawh tak a ni. Kan tet tē aṭanga ringtu kan nih avang hian tam tak chuan ṭawngṭai awmzia kan man lo niin a lang. Ṭawngṭai laia kan awm dan en hian mi tam takah chuan Pathian zahna leh ṭihna nungchang a lang lo ṭhin. Ring thar tirah inngai ila emaw harsatna tawp tawkah inngai ta ila, inngaitlawm taka ṭawngṭai awmzia leh pawimawhna kan Chiang deuh mai thei.

Kan lungngaih leh mangan lai, kan hlim lai leh kan lawm lai ber pawh Pathian hnen kan thlen hi kan Pathian duh zawng a ni a. Tin, Isuan nachang kan hre lo ang tih a hlau va, kan ṭawngṭai thiam lo ang tih a hlau va, a ngaih pawimawh em avangin ṭawngṭai dan turte min zirtir hial a ni.

Ṭawngṭai dan chi hrang hrang a awm a, dilna, thupha chawina, lawm thu sawina, thil tawn Pathian hnena thlen ve hrim hrim leh malsawm ṭawngṭaina te hi kan ṭawngṭaina tlanglawn te an ni. Eng pawh ni se, heng hmanga Pathian pawl hi Pathian duh zawng a ni a. Pathian nena kan lèn dunna a ni a, thlah thlam lova Pathian nena leng dun tam apiang an hlim ṭhin.

Kan chung a tuarna thleng ṭhin te hi Pathian min hremna an ni vek lo va. A changa kan chung a tuarna lo thlengah te hian lungawi loh a awl hle ṭhin. Mahse, min enkawltu Pathian hian amah hlata kan awm lai hian len dunpuiah min sawmna hmanrua pawh a ni thei. Chutiang ni a lo thlen chuan Pathianin min la hria a ni tia

Pathian nen leng dun tura rilru kan siam a pawimawh. Pathian nena leng dun tam apiangin hringnun an hmachhawn thiam a, mi vannei kan ti ðin.

Ṭawngtaia dilna kan thlenah hian dil dan dika kan dil leh chhâna dawnsawn thiam hi a pawimawh khawp mai. Dil dan dik leh chhanna dawnsawn thiam dan chu eng nge ni ta ang le? In dila, in dil dik loh vangin in hmu lo; in nawmsak nan hman in tum si (Jak 4:3). Tin, Jakoba pawhin ringhlel chung a diltu chuan eng mah a hmuh loh tur thu min hrilh. A bikin dilna chungchangah khian Isuan ṭawngtai dan min zirtir a. Chu chu dilna kan thlen apiang hian hre chhuak ðin ila. Chu chuan kan ṭawngtai chhâna leh kan dawnsawn danah thui tak a hrilh ngei ang.. Chu ṭawngtai dan dik Isuan min zirtir chu hei hi a ni (Mathaia 26:39) *“Aw ka pa, a theih chuan he no hian mi pel lul rawh se; nimahsela, keima thu ni lovin, nangma thu thu ni zawk rawh se.”*

He hunah hian Isua chu lungngaih tawpin a lungngai a. *“Ka rilru a lungngai em em a, thihna khawp hial a ni”* a ti. Tiang khawpa a dil chung pawh hian a ṭawngtaina tlip nan leh

chhanna a nghah dan tur chu “Nangma thu thu ni zawk rawh se” tih hi a ni. A va tlawm Chiang tak em!

Pathianin dil turin min hrilh a, pek/chhan kan nih tur thu pawh min hrilh bawk a. Ṭawngtaina hmangin thil tam tak kan dil a, chhâna pawh kan beisei. Mahse, kan ṭawngtai chhâna kan hmuh fuh theih loh chhan chu kan duh dan ang thlapa min chhân kan beisei vang a ni. Engkim i duh dan dana chhâng tura Pathian i beisei chuan; i la inphah hniam tawk lo tihna a ni. Hetiang ṭawngtaina hi a dik lo. Ani chu Lalte Lal, Hotute Hotu, lei leh van leh a chhunga awm zawng zawng siamtu a ni asin. Chuvangin, kan ṭawngtai chuan inngaitlawm leh thuhnuairawlh takin, amah ðih dêkin Lal Isua ṭawngtai dan ang hian kan ṭawngtai tur a ni.

Lei lalte chu kan duhna hun leh hmunah kan be thei lo va, kan len dunpui thei hek lo. Mahse, keini chu kan duh hun apianga koh theih Pathian kan nei hi kan va vannei em! Lei leh van siamtu kan Pathian nen chuan kan duh hunah, kan duhna hmunah zalen takin ṭawngtaina hmangin kan leng dun thei si a.

## JURGEN KLOPP



— F. Lallianzuali,  
Central Committee Member

**J**urgen Norbert Klopp hi June Ni 16, 1967-ah a piang a. Germany football player niin 1990 – 2001 chhungin Mainz 05 tan a khel a, inkhelh a chawlhsan hnuin Mainz 05 Club Manager atan ruat niin kum sarih chung he hna hi a thawk a, hemi chung hian Mainz 05-ten a vawi khatna atana Bundesliga khel theihna hun remchang a siam a ni. Kum 2008-ah khan Borussia Dortmund Manager atana lâk a ni a, Kum hnih a awm chungin a season khatnaah hian German champion Bayern Munich hnehin DFB Super Cup champion a nihpui a. Hemi bakah hian kum 2011 leh kum 2012-ah hian Bundesliga champion a nihpui a ni.

October Ni 8, 2015 khan Premier League Club Liverpool Manager Brendan Rodgers thlakin kum thum chung contract a ziak a. Kum 2016 July thlaah khan Klopp leh a staff-te chuan kum 6 dang (kum 2022 thleng) atan contract an sign leh a, tuna Anfield-a contract a neih mek hi kum 2026 thleng daih a ni. Football manager tha ber zinga chhiar hial a ni a, kum 56 mi Klopp

hi tunah hian English football division sâng pali zingah manager hnathawk rei ber pathumna a ni.

Liverpool fan pakhat thihna kotlanga ding mek Dave hnenah Klopp chuan thuchah hnuhnung a hrilh chu “*Christian ka ni a, kan inhmuh leh dawn nia*” tih hi a ni. Dave-a hnenah chuan eng nge i tan he thu hian awmzia a neih? tiin an zawt a, ani chuan “*Kristiante rin dan*”



*angin vanramah kan la inhmu ngei dawn nia tiin min thlah a, a tha ka ti hle mai”* tiin a sawi a ni.

“Ka hringnuna hlu leh pawimawh ber chu PATHIAN ka rinna hi a ni a, kan nun hi thilpek hlu tak a ni a, mi dangte pawhin ISUA Krista hi ring n min kaihruaitu tha ber a ni tih hi pawm se ka duh a ni” a ti a ni. Khawvela Football League har bera chhal ngam English Premier League club Liverpool enkawl chu harsain lang mah se Klopp hian a koa tla chu tihlawhtlingin Manager hlawhtling bera chhal ngam a lo ni ta a ni. Pathian chungnungber tana nung a nihna a dah pawimawhna chuan thlamuang takin a hmachhawntir thei thin a ni.

Borussia Dortmund chu hlawhtlinna ropui tak a chanpui hnuah Klopp chu football khawvela club hmingthang tak Liverpool FC manager a ni leh a. Liverpool-in kum eng emaw

zat chakna chang zo tawh lovin season hmasa lama Manager lo ni tawhte chuan chu boruak sang tak chu zo lova an awm tawh thin laiin Klopp erawh chu rilru hahdam leh thlamuang takin a awm a. Klopp chuan khawvela a hnathawh ve te chu a thlir dan hetiang hian a sawi a - *“khawvela kan thil tumte kan goals/hmachhawpte kan tihlawhtlin mai loh vangin kan hnualsuat tur a ni lo”* tiin, interview-naah Klopp chuan Liverpool chungchang min zawh dawn chuan season tinah lawm tur kan neiin ka hria, a ti a ni. Kum tina kan goal ber tur chu National Championship bakah Champions League-a chak a ni a ti. Jurgen chuan a season hmasa lamah League Cup final pahnihah chakpui zo lovin, nomawi an chawi zo ta lo va, a tir pahnihah chak lo mah se inlethah leh theih hun a awm ang tiin, Klopp chuan final-a chak loh chu a na a, mahse final-a chak loh pawh damdawi tha tak a ni

a ti. Naupan laia ka zir chhuah chu damdawi tha tak chu a kha a; mahse, a thawk tha thin a ti.

Klopp hi mi inngaitlawm tak a ni a, a nuna pawimawh ber chu Isua a ni tih a sawi uar hle. Klopp chuan Isua chu he khawvela a lo kalin a

lo kal chhan chu kan sualte amaha bel turin a lo kal a, hei vang hian Isua thihna khan thil z a w n g

zawng a thlak vek a, a thihna hian ama nun pawh a thlak thu a sawi a ni. Khawvelah hian a chungah eng pawh thleng se Isua nen an inkar a chiang a, ringtu a nihna angin a hma lam hun pawh Pathianah a nghat tlat a ni. Kum 2020 a inher meuh chuan Liverpool chu a wavi khat nan kum 30 hnua League-a a sang ber a nihpui a ni. Liverpool hla mawi leh lar tak *“You will never walk alone”* chu ring takin



Liverpool home ground-ah an play a. Kum 30 hnua an chakna an lawmna hla chu, *“When you walk through a storm, hold your head high up. And dont be afraid of the dark. At the end of the storm there’s a golden sky and the sweet*

*silver song of a lark”*

tih hi.

R i n g t u

c h u a n

Bible-a kan

h m u h

angin tu

pawh Isua tana rinawm chuan ro luah tur tam tak a nei a, chu chu football-a chakna aiin a hlu em em a ni. Rom 8:31 *“Chung thuah chuan eng nge kan sawi ang le? Pathian kan lama a tan chuan tuin nge min do thei ang?”* WALK ON WALK ON, WITH HOPE IN YOUR HEART, AND YOU WILL NEVER WALK ALONE.

## TAIMARAWH



— T. Upa K. Lalnunluanga,  
Zamuang Branch

**T**eh tawl mai a! Protestant, John Calvin-a zirtirna pawmtu te chuan “*Kristian chu a taima tur a ni a, a intodelh tur a ni.*” tih hi kan inzirtirna a nih avangin Presbyterian Kohhran thalai chu a taima tur a ni tawp mai a ni. Taima han tih hian a Chiang Nghal uar mai, thenkhat chuan, “*Mi taima lo an awm lo, kan taimakna kawng a inang lo mai chauh a ni*” an ti a. Ni e, Samdala pawh khan mi tam tak tih peih loh tur, âng chungin theipui rah tla a lo chang char char peih a nih kha. Tun tuma taimak tih kan sawi tum chu kan nuna a tha zawng, a sâwt zawnga taimakna a ni ti deuh kher teh ang.

Taimakna rah chhuah/a result chu intodelh a ni a. Intodelh hi mi zah kaina a ni a, mahni inrin tawknâ min siamtu a ni. Hengte vang pawh hian a ni ang intodelh tura taimak chhuah tur hian Paula hian ringtute hi min fuih nasa em em a, a Pathian thu a, amah ringtute chu kan intodelh tur a ni. Intodelh hi duh lo kan awm lo ang. Mahse, kan duh avang ngawt hian kan intodelh thei si lo lai hi a buaithlakna lai a ni. Intodelh duh ringawt, intodelh tura taimak chhuah leh chuan si loh chuan ‘duh kha a tawk’ an tih kha kan chan chu a ni mai. Intodelh tur chuan kan taima pawt tur a ni.

Taimak satliah ringawt hi intodelhna a ni lem lo thei. Mi pakhat chu a taima em em a, hmathlir em em a nei chuang lo va, a awm awm a thawk mawp mawp mai a, hnathawh tur a neih lem loh ni te hian an thenawmte in bul te va tihfaisak thin. Nimahsela, a taimakna khan intodelhna kawng a hawi lo mai thei a ni. Chuvangin, intodelh tur chuan taimak hi a kawng pui ber a nih rualin ngaihtuahna erawh kan sên ve det chu a ngai tih a Chiang reng mai.

**1. Mihringte hi hnathawk tura tih kan ni :** Gen 3:17,18 thu avang hian mi tam takin

hnathawh hi sual vanga Pathian anchhia emaw kan ti thin. Mahse, a ni lo. Mihring suala a tluk hma pawh khan Pathianin mihring hnenah khan hnathawk turin mawhphurhna a pe daih tawh. *“Leilung hi in thu thuin awmtir rawh u...”* tiin leilung leh a chhunga chêngte enkawl hna hi a pe a, Eden huan enkawl leh vêng turin Evi leh Adama kha dah an ni tih kan hria. Chuvangin, hnathawh hi mihring awm dan tur renga Pathian ruat a ni a, Bible-ah pawh taima tura fuihna hmun tam takah kan hmu a nih hi.

**2. Taima turin eng nge kan tih ang? :** A chhâna chu hna kan thawk ang. A nih leh eng hna nge kan thawh ang? Thalai tam tak hi chu thawh duh ang thawk thei si lo, thawh theih ang thawk duh si lo hian kan tei rawlai vel mai mai thin a nih hi maw! Kan lehkha thiam tam takte hi hna sâng deuh leh hahdam deuh, hlawh tam bawk si thawh kan duh a, chutiang hna chu kan hmu si lo a. Lehkha thiam hna hmu lo kan tam phah em em a nih hi. A nihna takah chuan an thawh theih an bula hna awm reng, a hahthlak leh hlawh tlem deuh avanga an thawh duh loh avanga hna hmu lo mai an ni a. An bula hna awm reng kha thawk ve mai

se hna hmu an ni mai. Agriculture Engineer te thleng hian Sawrkar pisa hlim hnuaia paper leh pen nen khera hna thawh kan tum a, kan line thlan leh kan tum kha a inmil tawh lo hrim hrim, chu chu Mizo Kristian zia a ni. Insiam that kan ngai hle mai. *“Hna hi kan hmuh ang ang taima taka thawk mai tur kan ni a, hna tha kan hmu lo a nih pawhin hna hrehawm deuh kan thawk ang a, a aia tha zawk kan hmu a nih pawhin taima takin kan thawk leh mai tur a ni,”* chu chu Pathian ringtute zia tur zawk a ni.

Kan thil thlir dan te pawh hi thlak ve a ngai a nia. Ni sensa hnuaia hnathawh chu hahthlak tak a ni. Mahse, kha ni sa kha tuar lo ta ila, ni sa tawrh hnua thing buk hlim nawmzia kha a nawmna tur angin kan pawh pha lo ang. Ni tina mahni in daia thuthlengseia mu chung a *“Ka status chumi zat chuan an view”* ti nileng that ai chuan kawla ni chhuak chhiara hna thawk thin ten Pathiannia mahni in daia lo daih nawmna kha an pawh zawk daih lo maw? Chutiang chiah chuan ni tin Pisa kaia hah taka rilru ngaihtuahna nilenga sêng chuan zan a lo niha, mahni in lumah engthawl taka TV hmaa thut veng veng nawmzia a hre

chiang bik ang. Chu chu mi awm mai mai te aia mahni hna taima taka thawkte vanneihna a ni.

Hnam fing zawkte chuan, *“Thawhrimna hi a tlukupui a awm lo ve”* an ti a. A awmzia takah chuan hna hi a hlawk em vang ni kher lo pawhin thawh loh ai chuan thawh hrim hrim kha a hlawk tihna te pawh a ni ang. Vai chhia kan tih mai mai te pawh hian thawh miah loh ai chuan thir chhhe zawn tal a hlawk tih an hria a, eng eng emaw zuar paw'n mahni State pelin in tinah an rawn lut peih a nia. Keini chu kan ni lo, a hlawk dawn loh ai chuan thawh loh thak pawh kan thlang zawk nia maw le. Thawh loh khan hlawn a tlem daih zawk tih kan la hre pha ve lo a ni. Hnathawh hlutzia hi kan inzirtir nasat a la ngai hle mai.

Khawvela ram Hausa leh ropui kan tihte din chhuahna bul chu taimak leh thawhrim vang a ni deuh vek mai. Japan ram hi an ram leilung a chhia a, thliarkar lung khawkrak hmun mai mai a ni. Lirngching nasa takin a sawi fo mai lehngal a, an ram hmun 5-a thena hmun li hi tlang ram ve bawk a ni a, Phaizawl awm chhunah an inek beng nghek mai a ni. A ram leilung lah a Hausa lo. Chinai lung leh Kat (Sulphur) bak an nei

fumfe lo. Chumi a chhapah 1945 (Indopui 2na) ah khan an ram khawpui pahnih - Hiroshima leh Nagasaki chu Atom bomb-a suasam a ni tih kan hriat kha. Mahse, an taima em em a, hna an thawk nasa a. Tunah chuan Khawvel ram Hausa pawl an rawn ni pha leh daih tawh a nih hi. Times Magazine-in a tar lan dan phei chuan Mazda Motors Company chuan an hnathawkten chawlh an lak duh nan chawlh sawi mawina essay inziah siak an buatsaih tawp mai a ni an ti. Ram leilung hausakna ai hian mihring taimak leh remhriatna hi hausakna bul a lo ni zawk tih a Chiang ngawt mai. Engkim that duhna ramah enga ti nge keini Kristian zawkte hi kan retheih em em le? A chhan chu, a chhunga chêng mihringte hi kan la taima taw lo tihna a va nih mai hmel ve.

**3. Pathian rawngbawlna kawnga taimak :** Mahni hna lama taimak a tulzia kan sawi mek lai hian Kristian, Pathian nung betu kan ni tih hi hre reng ila, *“Work is worship”* hi rawngbawltu tan chuan thil hauhawm tak a ni ve tih hi kan hre reng tur a ni. Keimahni hna rim taka thawk theia hriselna min petu, kan mamawh kan dil

mai piah lama kan mamawh tih pawh kan hriat loh thlenga min petu tan hian hna kan thawk ve thin tur a ni. Bible-ah engtin nge kan hmuh, *“Rinna chu thil tih tel lo chuan thi a ni...”* tih te, *“Dawngdah taka rawngbawltu chu anchhe dawngin awm rawh se...”* tih bakah hmun dang dangah Pathian rawngbawlnaah hian inthlahdah tur kan nih lohzia hi kan hmu chamchi a ni.

Chhun hun kan duh zawng thawh nana duh tawka kan hman zawh tawh hnuah kar khatah zan 4 vel Kohhran inkhawm pawh ti hlei thei lo, thla khata ni 30 kan neihah ni 26 vel mahni hnathawh nan kan nei a, chu ni 26 velah chuan thla khata ni 2/1 lek KṚP hnatlanga chhuak thei lote hi inen fiah kan va ngai tehlul em? Hun tha min petu tana kan hun tlem te leh kan theihna tlem te pek hi kan harsat a nih chuan, engkim min petu hian a tana kan pek ang zat lek hi min pe ve dawn ta se, kan ngai ngam meuh ang em le?

KṚP nula hawi paw pheu reng mai, zing dar 8:00 thleng thlenga la mu ang phauu thin kan ni em? Ei rawngbawl, in chhung chet bakah In leh a velah sekrek khawih tur neuh neuh in ngah em kha. KṚP nula ni awm rengin in chhung khur tan tangkai nasa leh zual teh. Tlangvalte pawh Khiangawia'n *“Nu leh pa*

*chawm hlum thak nih tum loh tur”* a tih ang deuh khan, i theih tawh hna thawh tur zawng ve teh. I chhungte tan malsawmna nih tum ve rawh. Tun anga a tui tha tha ringawt beiseia, mut nachang hre lo, thawh nachang hre baw si lo, mut dawnah aia zing thawh dawna i mut a chhuah zawk tlat reng chuan nilengin i zawi nguai reng ang a, chakai thi an ti mai ang che. Heti reng renga kan nun kan hman reng chuan Kristian Thalai Pawl te hian mi hnungah kawl ek kan thai kurh kurh reng fo ang a, hnam dang thalaiten min intodelh khalh daih mai ang.

A tawp berah chuan, KṚP member-te hian taimakna kawngah hian Pathian thu i awih thar leh teh ang u. Pathian pawh hian a rawngbawl tur hian mi taima a duh tih kan hria. Mosia chu Pathianin a beram veng lai a ko a, Gideon-a chu a buh vaw lai koh a ni. Petera leh a zirtir dangte pawh an len deng lai koh an ni. Tirhkoh Paula pawh mi taima rum rut mahni intodelh chungah Pathian rawngbawl a ni tih kan hria. Kan Pathian hian a rawngbawl tur hian mi taima a duh, thatchhe awm awl a hmang ngai lo tih hi hre thar ila, tan i la teh ang u. KṚP chu a taima tur a ni a, a intodelh tur a ni. A rawng kan bawlsak kan Pathian hi a taima si a.

## KTP LEH KEI



-- H. Lalremruata,  
Bethlehem Venglai



**P**athian khawngaihna changin kum 25 chung hruaitu chanvo chang vein hruaitute hnung zuia KTP huanga rawngbawla kan ke penna chu a lo tawp ve dawn ta reng mai. Mihring taka thlir pawhin lung a leng veng veng a ni ber mai.

KTP huang chung a rawngbawlna hrang hrangah, a chhia a tha, a hlimawm lam thlengin sawi tur a tam thei awm e. Kan KTP hun hmasa lam han ngaihnuah changin, Biak In Extension-a Concert huaihawt leh Ticket zawrh tih te, Biak In Chokaa lawiar kan tih te. Vawi khat chu Group sum tuakna atan Aromatic kan siam a, License kan nei si lo, Aromatic kan siam leitu pakhat Damdawi in an kalpui a, kan hlauthawng kan tawngtai nasatzia te kha aw! A va manganthlak tak. Zanah hian khumah kan mu meng kur mai a nih kha. YRC Hlimen-a hnatlan tuma hawna tur nei lo kan manganzia te, YRC, Falkland ram sam fai hnatlang neih tuma kan hruaituten min lo hawsan tuma kan hrilhhaizia te, sawi tur a tam thei awm e. Chutih rual chuan

thahnemngaihna leh infuihna lam thil han tar lan hi a tulin ka hria. Kan hruaituten remchang tha tak min pek avangin ka lawm em em a ni.

KTP rawngbawlna hi a hlu em em a, a hlutna pawh tur erawh chuan a ram leh a felna zawng chung zela taimak chhuah tang tang a ngaih chang a tam hlein ka hria. Mihring nuna taksa leh rilru a chak that lai huna insum theihna neih ngai tam lutuk te, insum theihna chuan mi pangngai dinhmuna min dintir lehna lai thlira a inchhirawm loh dan te, kan phu loh dinhmuna min hlang kai a, hriat loh ram thleng thlenga kan dai tak han thlir hian KTP hi a hlu tak zetin ka hria.

KTP-a kan tel tirh hian kan Branch hi member 480 vel kan ni

a, Group hruaitu dinhmuna kan din tirh laia kan sum tuakna Chingal thlawr leh zawrh leh tun dinhmuna kan sum tuakna te ka thlir a, a kar a zau ta hlein ka hria. Rawngbawlna atan sum kan mamawh a, a thawk chhuak tura theihtawp kan chhuah lai hian, KTP thupui chu **'Rawngbawlna tura Chhandam'** a la ni reng si.

KTP huanga hma lakna harsa ve tak chu Biak In hawnga inneih kawnga hma lakna hi niin ka hria. A harsatna lai ruama awm fuh tum chuan Eden bawhchhiatna kha rilruah a lo lang a, Evi leh Adama kha kan haw hlur mai zel a nih hi. Thahnemngai takin KTP ten inkhawmah leh chanchinbuah te kan han thial a; mahse, nilai zanah thunun an awm zur zut mai si. Rilru a kal fuh lo chang chuan Nilai zan inkhawmte hi a huphurh awm ru duh a nia aw. Tlar hmasa berah kimki tawkin kan thu a, thunun tur an awm loha kan lawm theihzia kha aw. Tunah chuan kan kumin a kal pel ve dawn ta reng mai.

KTP rawngbawlna leh Chanchinbu mawlh mai hi. KTP ten chanchinbu kan enkawl dan leh thuneihna kan neih dan pawh hi ram pum huap thlir chuan Branch hrang hrangte a inang lo viauin a lang. Kan Branch

Chanchinbu hi **'Thalai Arsi'** tih niin kum 1979 khan chhuah tan a ni a. KTP-in a enkawl hna hi kan kut ken vek a. Thu ziak rawngbawlna leh Kohhran thu leh hla tar lanna leh inhriattirna pawimawh takah kan hmang chho mek zel. Chanchinbu hmanga thalaiten rawng kan bawlna hi kan hlut thiam a tul zual hlein ka hria. KTP enkawl chanchinbu ve meuhin tualchhung a tanga Sermon, Article emaw chhuah tur a neih lo fo chuan Branch hruaitute kan tan a ngai thin. Sermon leh thu ziak tha tak tak fawm khawma kan chanchinbu enkawltute Google leh Internet, Whatsapp vela an tul viau chuan insiam that hret a tul nia inpawm a tha. KTP hruaitu Office Bearers ni chin te phei hi chuan he rawngbawlnaah hian theihtawp kan chhuah a tul. Thu ziak leh chhiar kawngah kan inthlahdah a rem lo, theihtawp chhuaha zirtirtu tur zawk kan ni tih hi KTP member-te hian kan hriat thar a tul tak zet.

Kohhran Zaipawl rawngbawlna chungchang hi han thlir leh ila, he rawngbawlna hi hautak zet mai a ni ti ila a sual lo theiin ka ring. Zaipawl intihsiak a awm tum phei chuan Camp te kan la nei zui a, Kohhran hun bik leh hunpui ah phei chuan zai na tur a



lo tamin hla kan zir dawt zut mai a. Zai thiam lo, lungleng ve thei tho si, zai lam tui miah lo tan phei chuan tawrhhlawm tak rawngbawlina nihna chen a awm thei awm e. Zaipawl hla zirte thingpui lo lumsak hi ka tih theih tawk a ni e, tia Biak In choka lama mahni in lama thingpui lum tha peih miah chuang si lo KṚP hruaitute leh member-te min khalh luttu a ni foin ka hria. Mahse, zaipawl rawngbawlina hi thalaiten kohhran rawngbawlina kawnga kan ta bil liau liau, tihmakmawh kan chung a inngat tlat a nihna a awm si. Fak leh chawimawi tura min kotu hian Amah kan fak leh chawimawi hi a phal ropui mai si a. Chuvang chuan, min kotu min kohna zawn thlir a, he rawngbawlina hna tihlawhtling tura ke kan pen a tul zual hlein ka hria. Zaipawl rawngbawlina hi KṚP rawngbawlinaah chuan ngaihhlutawm berte zinga mi niin ka hria.

KṚP rawngbawlina kal chho

zelah hian ngaihtuahna fim tak kan hman chhoh deuh deuh a tuln ka hre thin. NGO anga kan tiha mawi zawk tam tak hi KṚP activity-a seng luh kan nei tam tial tial em aw tih hi ngaihtuah a tulna chen a awm chho niin a lang. KṚP activity kan neih hi a tam rualin, huang kan zauh lutuk em tih hi inen let a ngaih chang a awm fo thinin ka hria. Thil tha ti tura buatsaih kan nihna lai kan hre lar lutuk a, KṚP thil tum ber pawh kan kal pel mai ang tih a hlauhawm. Thil tha tih tur tam tak a awm ang. KṚP te chuan Krista avang zelin thil tha chu ti ila, NGO huang leh KṚP huang erawh kan thlit fim thiam hret hret chu thil tul tak niin a lang.

KṚP, Pathian hruainain hma lam panin kal zel rawh se.

*‘Thil tha ti atan Krista Isuaah chuan siama awmin ama kut chhuak kan ni si a; chu thil tha tih chu kan awmna turin Pathianin a buatsaih lawk a ni.’*

### Tihdikna

January Issue-ah 2024 KṚP General Conference Programme tihchhuahah March Ni 2 (Inrinni) Hruaitu thlan leh Rorelna hmun tur **Ngopa Chhim Veng Kohhran Biak In** tih turah **Saitual Chhim Veng Kohhran Biak In** tiin lo chhuah palh a ni a, chhiartute leh Organising Committee chungah thupha kan chawi e.

## KAWNG THAR ZAWHIN KALPHUNG THAR NEN



— Lalhruaitluanga,  
Serchhip Vengchung Branch

**K**um 2023 Mizoram inthlanpuia kan ram dinhmun, ram hruaina hna thawka roreltu tur Party kan hre tawh a, kan beisei pawh a sâng viau. Thla tlem te chhunga an thawm pawh hriat a nuam e.

### **Kum 2024 kan chuangkai ta :**

Zoram hruaina kawnga a lu ber nihna la chelh ngai reng reng lovin hruaitu hna a chelh chho dawn a, a tum ber chu *kalphung thar* nena Zoram hi hmasawna kawng zawhpui a ni. Chu kalphung thar chu Zoram mipuiin a tak ram a thlen hun beiseina nen a thlirin thlan chhuah political party leh MLA te lam chu kan thlir ta thup mai. Chu kalphung thar chuan Zoram hi danglamna min pe thei ang maw? Zoram siam thatna hi Political field a tang ringawta siam that tur em ni? Zoram thar min pe theitu ber chu Kristianna nena rawngbawlna zau zawk hmachhawn hi a ni zawk lo maw? Mahni inchik ang..

Kan Kristianna hian zung kaih duh bik riauna hmun a nei em tihte hi he kristian ramah hian zawhna, mahni inzawh mawlh mawlhna tham khawpin a tua te pawh hian bawhchhiat kan nei mai lo maw? *Keimaha kal lo chu tu mah Pa hnenah an thleng ngai lo* tih ziak a nih kha maw.

Rawngbawlna han tih hi chuan Kohhran lam kan thlir deuh fur tawh awm e. Khawvela literature huai bera sawi, Kristiante'n kan rin pui ber Bible-ah chuan, '*Nang erawh chu engkimah fimkhur la, hrehawm tuar la, Chanchin tha hritu lam hna thawk la, i rawngbawlna kha hlen rawh.*' a intih vange pawh a ni ang Rawngbawlna hi kohhran tan bik riaua ngaihna awm a hriatna leh hmuhna ka nei.

Kohhran hian a ta neih riau em? Nge ni a, Kohhran hi kan ta neihtir? Kohhran pawn lama pawl thenkhat hruaitu tan paw'n a thikawm lek lek thin ang. Chanvo inruatna lehkha kan semah, *'He chanvo hi rawngbawlnaah ngaia hlen ngei turin kan ngen a che'* tih inziak a awm tel tawh chinah chuan ruata te tan chuan han phat leh pawh thil nuam a ni tawh lo. Kan tui emaw tui lo emaw hlen ngei pawh kan tum ta zawk thin. Rawngbawlna huang hi kan zim nge a zim sa? I rawngbawlna kha hlen rawh tih hi hlenna tur bik siam a ni em ni tih te pawh hi kan tunlai tualzal nuna Kristiante chet dan kan thlir chuan zawhna inzawh awm reng pawh niin ka hria. Kohhran leh khawtlang chu kan ke ding lam leh vei lamin hma lam min panpui ang mai a, hma lam kan panna kawnga kawng pawimawh min zawhpuitu tur a nih laiin, zawh loh nghawngkaw bah chhuanlamin kan bai fo em tihte pawh hi inchik a ngai tawh viau mai thei e.

Tin, Kohhran kut ke ni tura buatsaih kan nih laite hian KTP

hnathawh tihpuitlinna kawngah ringawt hian kan lo inhmang ang a, Kohhran inkhawmte kohhran hnatlangte hi kan lo *Skip* zeuh zeuh ang e aw. Inkhawm bana hla zirte hi inkhawm lo hian kan lo kal du du zel ang e. Laklawh chu an awm ngei e.

Kan khawtlang innghahna, nu leh pa ang hiala kan ngaih YMA pawh hi din a nih dawn khan a huap zau zawk dan tur nasa taka ngaihtuah a nih hnua din a ni a. Kristiante tan chauh kan tih chuan mi a hip lo ang e tia Young Lushai Association ti ta pawh an ni reng a. Savun Kawrfual haa thlarau khawvel thleng tawh Lalhmingchhuanga Zongte chuan, *"zau zawka kristianna keng chhuak tura pawl thar din rawt"* tiin YMA lo din chhuah dan a rin thu a sawi a, a awmzia bera lang chu Kristian sakhaw thila a tha thei ang bera kan inpekna kha Kristian lote tan pawh chhenfakawmin hlawkpuina tham ni ve rawh se tihna a ni berin ka hria. A chanchin tha hril rilru viau mai a. YMA-in a tum pathumte kan thlir chuan he rin dan hi a pawmpuiawm viau;

YMA pawh hi a lo Kristian viau a nia. Chuti a nih chuan YMA in khawtlang hmasawn nan leh thatna tura a hnathawh tihpuitlinna kawngah rawngbawlna rilru hi pu lutin khawtlang tan thil tha ti ila. Chutiang zelin pawl danga kan inhmannah te, kan ni tin hun hmannaah te he rawngbawlna, rawngbawltu nihna hi lan chhuahtir ila, chu chuan ram leh khawtlangah nasa takin hmasawwna a thlen ang a, Zoram tana kan beisei pawh a paw chhuak berin ka ring.

YMA leh khawtlang hian Kohhran hi chhuahsan rawh a tih ka ring lo a, Kohhran hian Kohhran huangah chauh rawng i bawl ang aw a tih lah ka ring hek lo. Kan taimaknain a thlen chin, kan hmel a lan mawina tur chinah dai danna bang kan siam mai zawk niin a lang. Chutiang a nih chuan i rawngbawlna kha hlen rawh tih thupek kan dawn hi thu min petu mit hmuhah hlen kan nih hi ka ring lo.

Eng vangin nge Mizote nunah Kristianna khan ban a phun a, a insawh ngheh em em? Eng vanga hma la chak em em nge

a nih tih zawhna, mi tam takin a chhanna an hmuh chu mi dang tana malsawwna nih duhna kha a nih ngei ka ring. Mizo nunah chuan hei hi lo eiin lo in ve rawh u tiin an thil neih apiang kha an inhleh a, mi dang ke pen ruala pen ve thei lote pawh an zangkhai phah mahna tiin khawtlangin an pui thin a nih kha. Nula thing phur hawin natna avanga thawk thei lote kawt kaia a keuh chang a tam a, thian chhan thih pawh an ngam hial a nih kha. Chutiang karah chuan Kristianna chuan Pathianin Abrahamah hnena, “Nang malsawwna ni ang che.” a tih kha hmathehin thopa zuan takin ngampa takin a zuang dawrh dawrh a, buhpawl kang ang maiin Zoram dung leh vang chu kar loah a kang duai duai a, kum tam a ral hmian Kristian zaah za tih tawngkam pawh hman nuam kan tih viau kha maw.

Kan tunlai khawvel dinhmun kan hria. Kristian zaah za tih chu sawi loh, a ring tawha te ngei pawhin Pathian awm loh kan ring leh hnuhnawh tawh a. Heng Pathian awm rin lohna

rawn piangte hi Kristianin rawngbawlna huang a zim lutuk vang te, Kristianin a tih ngei tur a tih loh vangte a ni mai lo maw? Eng pawh chu lo ni se, kha lam kha chu sawi thui lo ila, Kristianna atang hian ram i vei thar leh teh ang u. Mizo History bu pui tih hial khawpa mawi Pu B. Lalthangliana chuan, “Tunlaia Mizo hnam nun LAIPUI chu Kristianna a ni a. Social Reform kawnga hma la tak tak tur pawh hian Kristian Sakhua atanga kan tan a tul a ni.” a tih hi a dik hle awm e. Tunlai thalaiah ram leh khawtlang vei chu khawiah, chhungkua pawh vei lo, mahni inhmu tha em em, its my life tih rilru ngeth taka pu hi kan tam khawp mai. Hei hian kan kristianna, kan rawngbawlna huang bakah kan khawtlang nun a nghawng tih reng kan hre si lo. Mahni invei ila, khawi laiah hian nge Kristian ni siin rawngbawlna ka hlen loh a, khawiah hian nge hma ka sawn ang tiin mahni inzir ila. Kan that lohna kan hmuh a siam thatna kawngah ke kan pen chuan, chhungkua leh khawtlangah a tha zawngin nghawng a nei ngei

ang. Chuvang chuan Kristian Thalai Pawlte hi Krista chanchin tha puan darh a nih kawngah tha thawh hlawk ber a ni a, Zofate hmasawwna tur ngaihtuah chung zelin Kristian nun dan tha hi i ngaisang deuh deuh teh ang u. *Keiniho hi Krista rawngbawltuah leh Pathian thuruk enkawltuah miin min ngai rawh se* tih ziak a ni si a.

Political Party-te paw'n kalphung tharin rawngbawlna hna thawk sela. Keini KTP-te paw'n Kristianna nen rawngbawlna zau zawk, kan vela awm apiangte hmuh leh hriat turin thawkin hlen ila, mi dang tana malsawmna ni chungin kan beisei *Van Kanan* khi he leiah tem lawkin *Zoram Tharah* lungrualna nen, zangna dawmna ngai lovin zalen takin tual kan leng za mahna.

*Mi zawng zawng hriat leh chhiar kan ni.* Chuvang chuan Rin hi thil tihah chang sela. Rawngbawlna hi kalphung tharin thawk ila. Tichuan, kan ram chu malsawmin a awm ang a, *Ram chu Lalpa ta a ni* tiin bang lovin kan zai thei ang.

**Tv. Malsawmdawngliana**  
*Central Committee Member*



**HRAUITUTE**  
*Chanchin*

**T**v. Malsawmdawngliana hi Pu C. Thangdela leh Pi Lalthianghlimi te fa pali zinga a naupang ber niin June Ni 5, 1983 khan Civil Hospital, Aizawlah a lo piang a, an unau hi mipa pathum leh hmeichhia pakhat niin an upa ber mipa hi a boral tawh a ni. Eizawna lamah tunah hian Icfai University-ah Librarian hna a thawk mek a, Republic Veng, Aizawlah khawsain an inbengbel a ni.

Kum 20 mi a nih aʔangin KṰP-ah a tel chho va, Kohhran zaipawlah te telin Group OB a ni chho ʔan a, Kum 2009 aʔangin Branch Committee-ah lutin, Kum 2015 aʔangin Branch OB a ni a, Republic Veng Branch-ah Kum 9 lai OB chanvo a chelh a, Finance Secretary tih loh chu post a chelh kim vek a ni. Bial ah Kum 2016 aʔangin a lut chho a, Leader leh Treasurer post chelh tawhin tunah hian Ex-Of-ficio-in a awm mek baw.

Kum 2020 KṰP General Conference, Serchhipa neihah Central KṰP Committee Member atan thlan tlin a ni a, kum 2022 KṰP General Conference, Kolasiba neihah a vawi hnihna atan thlan nawn leh niin Kristian ʔhalai chanchinbu Editor atan ruat a ni. Kum 2021-2023 chung khan PYF Editorial Board Member a lo ni tawh baw a ni.

Naupang Sunday School lamah hian zirtirtu leh department secretary te ni tawhin NPSS Asst. Secretary leh Secretary hun rei tak a nih hnuah Intermediate Leader-ah kum 4 a awm a, tunah hian Senior Department Leader-ah a kum hnihna atan a awm mek a, Kohhranah Inrinni zan thuhritlu a ni mek baw.

Khawtlang rawngbawlna lamah pawh theih ang tawkin a inhmang ve thin a, Branch YMA Committee Member te pawh lo ni tawhin tunah hian Section YMA lamah hruaitu a ni mek a. Tin, Mizoram Library Association hruaitu zingah a tel mek baw a ni.

Mama tiin an ko mai thin a, a mizia hi mi ʔawng tam lo, mi pawi sawi hlau leh mi zaidam tak a ni a, rawngbawlna ngai pawimawh mi leh a koa chanvo tla chu theitawp chhuaha hlen tum tlat mi a ni. Amah be pawp duh tan Ph. No. 9862344764-ah biak theih reng a ni e.



### FALKAWN BRANCH KTP

Falkawn Branch KTP chuan Ni 11-19 November, 2023 chhung khan Maduripathar Kohhran, Assam-Arunachal West Mission Field-ah Work Camp an nei a, Member 23 lai an kal thei a ni. Ni 11 November zing dar 7:30-ah Silchar panin Biak In atangin an chhuak a. Silchar atang hian Rel-in Dibrugarh lam pan lehin, a tuk chawhma dar 11:00 velah an tum ram, Maduripathar chu Pathian hruainain tuang takin an thleng a ni.

Pathianni zingah Compound lama thawktuten chaw hlui an lo buatsaihsak a, zan lamah Hostel naupang puala inkhawmah inkhawmpui vein a tuk thawhtanni atangin an hna an tan a. An hna thawh tur ber hi rawng hnawih a ni a. Boys Hostel leh Warden Quarters sak thar, Building lian tha tak pahnih chhung leh pawn rawng hnawih chu an hna tur a ni a. A tuk thawhlehi nilenga chhonzawm lehin, tlai lamah thawktute nen zanriah an kil ho leh a, zan lamah Compound-a thawktute inkhawmnaah an inkhawmin hun an hmanpui leh a ni. Pu Zakaria Lalnuntluanga (Leader) hnen atangin Pathian thuchah ngaihthlak a ni a, Zaipawl bakah Solo leh Trio an nei thei. A tuk Nilaini hian ruahmanna awm sa angin Bial chhung Kohhran hrang hrangte tlawh kualin hun an hman a. Zan lamah hian Kohhran Pahnih, Rai Bosti leh

Milanpur Kohhranah inthen darhin inkhawmna an hmanpui a ni. Ningani leh Zirtawpniah rim takin rawng hnawih hna an chhonzawm lehin an hna tura ruahman chu tuang takin an thawk zo thei a ni.

Pathianni tlai dar 3:30 haw turin an inbuatsaih a, a tuk Thawhtanni zing dar 9:00 velah Silchar an thleng a. Silchar-ah hian Pu Vanlalhlira te chhungkuain chhun thingpui leh a hmeh tui tak an lo buatsaihsak a, an chungah an lawm hle. Silchar atangin Mizoram lam pana rawn chhuak lehin, zan dar 12:00 velah tuang takin in an rawn thleng thei a ni.

Work Camp an neih chhung Pathian hruaina an chanah lawm thu an sawi a. Engkima lo buaipuitu Maduripathar-a thawktu zawng zawngte chungah lawm thu an sawi bawk a ni.



## HRINGLANG TLÁNG

*Nula pakhat hi Park-ah thuin pangpar a lo pawt til a, pakhat a pawh thlak pah apiangin, “Loves me, loves me not” tiin a lo phun melh melh a. A ni lah taka he nula hian bialpa hmangaih deuh mai a nei a, a bialpa khan a chang chuan a hmangaih ve niin a hria a, a chang chuan a hmangaih lo niin a hre bawk si a, a rilru a lo hah viau ni tur a ni.*


*Min hmangaihtute bula awm hi a nuamin thla a muang thin a, min hmangaih miah lote bula awm erawh a hahthlak viau mai. Kan hmangaih deuhten min hmangaih ve lo nia kan hriat phei chuan kan na viau thin reng a ni.*

*Mihring inhmangaihna chuan tawp chin a nei a, nu leh pa leh fate inhmangaihna chu a nghetin a thûk zawk pawh a ni mai thei e, nula leh tlangval inhmangaihna phei chu ramri kham chin a awm fo thin. Min hmangaihtu nia kan hriat kan hmangaih viau emaw kan tih te pawh hi han inkalsan meuh chuan kan lo inhmangaih lo tih hi kan hre chhuak leh fo thin a ni.*

*Tawp chin nei lova hmangaihna chu Pathian hmangaihna chauh hi a ni a, chu hmangaihna chu miin a hmuh fiah tawh chuan a thlah phal tawh lo va, ramri a kham tawh hek lo. Rinhlelhna tur a awm ve tawh lo va, Min hmangaih em? Min hmangaih lo em? tihah buaina tur a awm tawh hek lo. Isua chuan min hmangaih em avangin kan tan a nunna hial a hlân a, min hmangaih ve zuai pawh ni lovin a zawng zawngin min hmangaih a, keimahni zawkin kan kalsan loh phei chuan min kalsan ve mai mai ngai lo. Kan vawn ngheh poh leh min hmangaihna thûk zia kan hmuin kan hre Chiang a, amah kan duhna leh kan hmangaihna a zual telh telh zawk thin a ni.*

*Lal Isua hmangaihna chuan tu mah a thliar ve lo va, chuai ni a nei ve ngai lo. Chu hmangaihna aia hlu leh ropui hi he khawvelah hian a awm chuang lo ve....*





# KANTU KHAWZAWL DINTHAR BRANCH

**K**hawzawl Dinthar Branch KTP hi February ni 8, 1981 zân aţangin section angin a lo ding tan a, kum 1982 January Ni 31-ah Branch puitlingin a lo ding a ni. Pastor Bial thuthmun niin member 302 (Mipa 181 leh Hmeichhia 111) an awm m k a, Kristian Thalai chanchinbu copy 72 an la m k bawk. Kum 2024 atan group 3-ah inthen a ni a, group tinte hi group budget tuksak theuh an ni. Branch inkaihhraina dan buin a sawi angin Sub-committee 12 din a ni a, Junior KTP din a ni bawk. Branch pualin chanchinbu ‘KTP AW’ Pathianni tin tihchhuah thin a ni. Kum 2023 chungin ₹ 6,13,010 thawh chhuah a ni a, Kohhranah ₹ 1,18,000 an chung l t a ni.

Thawhtanni zan inkhawm hi sermon, thupui zir, sharing leh special programme hun atan hman thin a ni. Thawhtanni zan inkhawmah hian group inchhiarna neih thin a ni a. Pathianni chawhma inkhawm banah tawngtai inkhawm leh fellowship neih thin a ni bawk. He hunah hian Nau piang chibai b kna lak khawm thin a ni a, kum tawpah Lal piang chibai b kna hi mamawhtute hnenah sem chhuah leh thin a ni.

An sum hmuhna tlangpuite chu Faith Promise, blanket suk, electric bill khawn leh inhlawhna remchang awm apianga inhlawhte a ni. Kum 2024 project atan General conference kal, Sound system tichangtlun, electronic drums lei te an rel a, KTP member thi an awmin ₹ 1,500 in r l thin a ni a, Biak In hawnga nupui pasal nei

an awm chuan ₹ 1,500 man thu ziak leh Holy Bible pek thin an ni bawk.

Krismas leh Kum thar inkarah Winter sports meet hman thin a ni a, hetah hian branch-in chawimawina a siam hrang hrangte - Hla zir tam, hnatlang tam etc. chawimawina pek thin a ni a, KTP Miss leh Mister thlanna neih thin a ni bawk.

Kohhran hun pui apiangin Kohhran Zaipawlten hla an rem thin a, Central KTP leh Pastor Bial KTP aţanga bawhzui tur lo kal apiangte a hun takah kan tihlawhtling zel thei bawk. SMB hnuaiah Missionary chhuak member pakhat leh Myanmar Mission Board hnuaiah Missionary-a chhuak member pakhat an nei mek a, Branch hmingin Tirhkoh 10 an chawm mek a ni.

# Keimahni



- January ni 5 (zirtawpni) khan Ngopa bialtu Minister-in KṚP General Conference chungchanga inhmuh khawmnaa tel tura a sawm angin Central Committee atangin - Upa Lalmuanpuia (GS), Pu Jonathan Lalhruitluanga, Pu C. Lalkhawngaiha, Tv. PC Lalthanmawia leh NI. F. Lallianzuali, Committee Member te an kal a, General Conference atana ṭul leh pawimawh hrang hrang sawi hoin pandal an tlawh bawk a ni.
- January ni 12 (Zirtawp) zan khan KṚP General Conference Vawi 60-na puala T-Shirt siam chu CKṚP Leader Rev. Dr. F. Pachhungan a tlangzarh. T-Shirt hi rawng chi hnih-a dum leh a Grey siam niin tun dinhmunah hian 10,000 siam phawt a ni a, a quality pawh a ṭha viau mai. T Shirt man hi pakhat ₹500 a ni dawn a ni. A mal leh a hlawma la duh tan **Flody Agency (9862355031)**, Khatla kawnah ngaihven theih a ni ang.
- January ni 13 (Inrinni) khan Excise & Narcotic Department buatsaih, “Ruihlo chungchanga Kohhran Ṭhalai hruaitute nena inkawm hona” ah CKṚP OB te an tel ve a ni.
- KṚP Necktie thar siam a ni a, a man hi ₹ 350 niin a hlawm (12 pcs) a late tan ₹300 in Kelvi International-ah lei theihin a awm a ni.
- January ni 18 (Ningani) khan kumina a vawi hnihna atan KṚP General Conference neihna tur Ngopa tlawhin hruaitute - Upa F. Zoherliana (Fin. Secretary), Pu Jonathan Lalhruitluanga, Tv. C. Lalbiakmawia, Pu K. Lalfakzuala, Pu Rossi Lallawmawma, Pu C. Lalkhawngaiha, Pu F. Lalremruata leh T.Upa TC Lalremsiama te an kal.
- KṚP General Conference inbuatsaihna in a vawr tawp a thleng chho mek zel a, General Conference zai hruaitu turte leh Jubilee Concert-a zai turten theihtawp chhuahin hla an zir ṭhin a; tin, Mizoram Synod Choir Member lo ni tawh zawng zawng Zaipawlpui pawh an inbuatsaih ngawrh viau. Heng bakah hian Bial hrang hrang chanvo nei turte pawh theihtawp tak meuh meuh chhuahin an inbuatsaih a ni. Conference hlawhtling kan neih theih nan kan ṭawngṭaina lamah theihngilh lo ila.



## KANTU - KHAWZAWL DINTHAR BRANCH

### CENTRAL KṲP HRUAITUTE 2022-2024

#### Office Bearers

Leader	:	Rev. Dr. F. Pachhunga	9717371338
Asst. Leader	:	Pu LV Lalthantluanga	8974007486
Gen. Secretary	:	Upa Lalmuanpuia	9436142398
Asst. Secretary	:	Upa Johny Lalawmpuia	9612587039
Treasurer	:	T. Upa PC Vanlainunmawia	7005885494
Fin. Secretary	:	Upa F. Zoherliana	9862846187

#### Committee Members

Tv. Malsawmdawngliana	9862344764	Pu Jonathan Lalhruiatluanga	8131984506
Tv. Vanromawia	9612215741	Pu Lalrempuia	9862857357
Upa Lalchharmawia	8014445696	Pu K. Lalfakzuala	9436733838
Pu H. Rosangzuala	7005283942	Tv. C. Lalbiakmawia	8794198948
Pu Lalnunsanga	8014415097	T.Upa Lalbiakthuama	9862114383
Upa Robert Lalrinawma	9862365583	Pu R. Lalmalsawma	9862420406
Tv. Rinsailova Sailo	9862327187	Pu Lalruatfela	9774611124
Pu F. Lalremruata	9436362544	Tv. PC Lalthanmawia	8014697370
T. Upa TC Lalremsiama	9612777977	Pu C. Lalkhawngaiha	9774638471
Pu Rossi Lallawmawma	9862145940	Pu C. Hmingthanauva	9436198787
Nl. F. Lallianzuali	9774764394		

Nl. Agnes Lalrinzuali (Asst. Co-ordinator i/c KṲP, Synod Office) - 8119964685

#### Ex-Officio Members

Rev. R. Vanlalnghaka	-	Synod Moderator
Rev. PB. Mankima	-	Synod Secretary (Sr.)
Rev. Dr. K. Lallawmzuala	-	Executive Secretary i/c KṲP

#### 2023-2024 KUMPUAN THUPUI : ṲAWNGṲAI TAM

*Engkim, ring chung a ṲawngṲaia in dil apiang in hmu ang, " a ti a. (Matthaia 21:22)*


Postal Regn. no. MZR/116/2024-2026  
RNI No. MIZMIZ/2009/29074



General Conference Diamond Jubilee T-Shirt  
CKTP Leader-in a tlangzarh



General Conference inbuatsaihna  
zal hruaitute hlmthla



General Conference inbuatsaihna Jubilee Concert hla zir



KTP General Conference Organising Committee te leh Central hruaitute

Printed and Published by Upa Lalmuanpuia, Synod Office, Mission Veng on behalf of Christian Youth Fellowship  
Folited by Malsawmdawngllana and printed at Synod Press, Mission Veng, Aizawl, Mizoram. Copies - 43,000